



撈起海肚个溫度

年下仔寒流乍乍到，海面空氣強強會結凍，好得冷風吹毋入用電暖器圍起來个都市，寒熱針正能維持春天个度數。毋過，冷風利過刀，本本向南吹入無俚毋靠个桃園海唇，在這種打狗就毋出門个半夜，佢嘎趑趑走到觀音工業區大崛溪个出海口。

氣象局个潮汐報告，這下堵好像半夜个滿潮，溫度罇冷，在這河海交會處會錫來一尾一尾看毋真切个希望——又安到鰻線个鰻魚苗，故所乜錫來一群討生活个鄉親來到這尋機會。鰻線一尾十個銀或者更多，價數看數量決定。鰻魚係「降河性洄游魚類」，摻鮭魚倒反，先在淡水河壩肚成長，到成熟愛打卵个成魚正轉到大海，魚崽仔又在寒流天漲潮時節洄轉河壩。

漲潮个海水在腳脣一寸一寸淪過來，浸過腳趾、浸過腳盤，佢在冷過霜个海風中緊顫緊退。幹頭向海浪聲个方向看過去，看毋著半夜个海，淨看等一盞盞細細蕊个頭燈像火焰蟲，頭燈單淨照光腳下一呎近个海水，看起來就像山壠肚个一窟山溪水，毋過，「易漲易退山溪水；易反易覆小人心」，一窟山溪水還驚會打走一片山排，一片恁大片个海，係發起謔來，毋知會仰般？在看毋著前途个半夜海浪聲中，這兜人算來係毋知驚？抑係無閒驚？緊想緊痛。

佢兜著等連身个水衣褲，怙怙緊看自家个魚撈仔入水肚、出水面，頭燈下又認真緊看，鰻線當細尾，像成寸長个線節，故所正安到鰻線，又白色半晟光，一下無認真就會打爽放鰻線轉大海。大家頭傾傾仔無麼个講話，成下仔會有人出聲「一尾！」接下來脣口就會有幾下聲「唉～」

這海肚撈鰻線个鄉親，係民國四十九年為著發展工業需要水力發電，犧牲自家个家園分人起石門水庫該下，徙到這觀音海唇移民新村个第二代、第三代，因爭海唇个海沙田種作難、生活艱苦，山上人嘎愛落海撈鰻線補貼生活。佢大聲問一位阿伯，暗晡夜撈幾多尾？佢摻佢搵算，新聞報導這下價數一尾百七，係有十尾，就比日時頭上班還好加多。阿伯面向陸地个故鄉方向無正面回答，顛倒謔惶惶仔將撈仔大力向岸上一擡就跋上岸，又直直向等看鬧熱个佢行過來，再伸出雙手用壓過海浪聲个聲頌摻佢講：「汝係教授無？慁來握手，佢既經連三暗晡打宕窿矣，祈求若手能帶分佢好運。」

包尾，在滿係工業區廢水个岸脣，佢歡歡喜喜个拿等三暗晡來个第一尾鰻線展寶分佢翁相，毋過，這時節既經開始退潮，就愛收工矣。阿伯講：「佢兜都係大戇槌，這種天時毋到屋下跔被骨，走來這浸冷霜。」

該阿伯偷偷掙忒个目汁，十二月北風都看著，毋過，開等電暖氣行入夢鄉个人敢知，半夜還有人在冷過霜个海上撈溫度。

作者：張捷明

☆詞彙學習☆

【乍乍到】zag` zag` do：接二連三到來。

【半晟光】ban cang` gong`：半透明。

【魚崽仔】ng` zai` e`：剛出生的小魚。

【打宕窿】da` tong lung`：錯過。